

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj: 7/10), na prijedlog Ministarstva za obrazovanje, nauku, kulturu i sport, Vlada Zeničko-dobojskog kantona, na 26. sjednici, održanoj dana 07.09.2015. godine, d o n o s i

ZAKLJUČAK

I.

Prihvata se Mišljenje Ministarstva za obrazovanje, nauku, kulturu i sport, doneseno po Inicijativi-Prijedlogu zastupnika Samira Lemeša, broj: 01-38-15217/15. od 04.08.2015. godine, vezanu za formiranjem elektronskog registra nastavnika u osnovnim i srednjim školama na području Zeničko-dobojskog kantona, a koje se prilaže uz ovaj zaključak i smatra njegovim sastavnim dijelom.

II.

Zaključak se upućuje u daljnju skupštinsku proceduru.

III.

Zaključak stupa na snagu danom donošenja.

Broj: 02-_____/15.
Datum, 07.09.2015. godine
Zenica

PREMIJER

Miralem Galijašević

DOSTAVLJENO:

1x Skupština Zeničko-dobojskoga kantona,
1x Ministarstvu za obrazovanje, nauku, kulturu i sport,
1x a/a.

U vezi sa aktom Stručne službe Skupštine Kantona, broj: 01-34-13082/15., od 19.06.2015. godine, koji se odnosio na zahtjev za davanjem odgovora na podnesenu inicijativu Samira Lemeša broj: broj: 01-38-15217/15., od 04.08.2015. godine, vezanu za formiranjem elektronskog registra nastavnika u osnovnim i srednjim školama na području Zeničko-dobojskog kantona, resorno ministarstvo daje sljedeće:

M I Š L J E N J E

Razmatrajući podneseni prijedlog-inicijativu zastupnika Samira Lemeša, naglašavamo da je resorno ministarstvo razmotrilo dato obrazloženje prijedloga-inicijative uvaženog zastupnika, te utvrdilo da su ova pitanja, u postojećim obrazovnim rješenjima, uključujući i neka od rješenja u našem okruženju, u dovoljnoj mjeri već regulisana i to sa više zakonskih i podzakonskih propisa, te da se kao takva dotiču i određenih ustavnih kategorija poput ravnopravnosti u pristupu javnim službama, prava na rad, jedinstvenog tržišta rada u BiH i slično. Ovdje posebno naglašavamo činjenicu da se aktuelno tržište rada na području ZDK-a, ne može posmatrati kao „zatvoreni sistem“, tako da su i svi postojeći podaci o kandidatima za upražnjena radna mjesta u javnim obrazovnim ustanovama, vezani samo za pojedinu školsku godinu i za istu raspisane konkursne procedure. Primjerice, ne postoje nikakva zakonska ograničenja da se na konkurse ne mogu prijaviti zaposlenici sa područja drugih kantona, općina unutar BiH i slično, tako da bi isti bili dovedeni u neravnopravan položaj u odnosu na zaposlenike za koje bi se formirao elektronski registar, i koji bi se kao takav dopunjavao-ažurirao tokom kalendarske-školske godine. Pored toga, svi trenutno nezaposleni nastavnici, ali i svo ostalo osoblje škole, (stručni saradnici i saradnici, izostavljeni iz predmetne inicijative), i koji se ne nalaze u takvom sistemu jer nisu u školama, također bi bili nejednako tretirani prilikom zapošljavanja. Pored toga, ovaj organ kantonalne uprave je u saradnji sa obrazovnim sindikatima, donio adekvatne i provodive akte, **(Kriterije i Okvirni program zbrinjavanja mogućeg tehnološkog viška u našim školama)**, dok odobrene konkursne procedure neposredno provode škole kao pojedinačne pravne osobe, odnosno poslodavci, tako da nema nikakvog zakonskog uporišta da organ uprave izdaje bilo kakve dokumente, (ispise iz registra i slično), kojima bi zamijenio propisanu dokumentaciju koju već izdaju nadležne općinske službe, drugi organi uprave ili sudovi. Također želimo naglasiti i činjenicu da je većina te dokumentacije, po prirodi stvari, promjenljivog sadržaja ili rokova trajanja, **(podaci iz kaznenih evidencija, državljanstva, dodatnih usavršavanja i slično)**, tako da nije moguće konačno utvrditi njihovu pouzdanost u odnosu na podatke u registru. Isto tako nije moguće da se eventualna odstupanja u smislu plagijata ili lažnih i netačnih podataka koji se dostavljaju u elektronski registar, sankcionišu „...trajnim gubitkom prava prijave na konkurs..“, kako to obrazlaže podnosilac inicijative, jer se takva ograničenja mogu nametnuti samo Zakonom, ili posebno propisanim postupcima u kojima bi takve povrede bile konačno utvrđene, **(dakle i dvostepenost u odlučivanju, žalbe, prigovori)**, a što bi nas udaljilo od osnovnog cilja koji se htio postići uvođenjem elektronskog registra. S tim u vezi smo i zauzeli stajalište da u ovom trenutku, navedena inicijativa uvaženog zastupnika nije prihvatljiva niti provodiva u aktuelnoj obrazovnoj praksi, te da kao takva ne bi doprinijela bitnom poboljšanju, odnosno pojednostavljenju pribavljanja dokumentacije propisane i utvrđene konkursnim procedurama.

S poštovanjem,

MINISTAR
Mensur Sinanović

Dostavljeno:
1x Stručna služba Vlade
2x a/a-02/02.